

Najib bimbang tanpa 'wasatiyyah', rakyat jadi liberal, ekstremis
Malaysian Insider
Oct 27, 2015
Oleh Md Izwan

Datuk Seri Najib Razak menyifatkan hanya dengan pendekatan wasatiyyah (kesederhanaan) masyarakat dapat dibendung daripada terjebak ke lembah liberalisme dan ekstremisme yang merupakan ancaman utama kepada mana-mana agama.

Perdana menteri berkata hari ini, wasatiyyah sangat penting kerana ia merupakan aspek yang seimbang dan terbaik bagi mana-mana masyarakat.

"Tanpa wasatiyyah, masyarakat akan mudah terjebak ke dalam ekstremisme yang mengakibatkan radikalisme seperti IS (Islamic States), atau ekstremisme yang akan mengancam agama seperti liberalisme dan ekstremisme," katanya.

Beliau berkata demikian semasa berucap merasmikan Seminar Antarabangsa Agama dan Keharmonian Hidup Bersama di Institut Kefahaman Islam Malaysia (Ikim) di Kuala Lumpur, petang ini.

Najib berkata, jika konsep itu dihayati dan menjadi asas dalam kehidupan masyarakat, agama mampu menjadi jambatan yang diperlukan dalam dunia hari ini.

"Ia membawa mesej berlaku baik, ketabahan dan keadilan, selain menolak semua bentuk kejahatan, saya yakin agama boleh membina jambatan yang kita perlukan dalam dunia hari ini," katanya.

Najib juga menekankan membina keamanan dan memelihara keharmonian adalah tanggungjawab penting tanpa mengabaikan kesepaduan dalam agama sendiri.

"Jadi, keamanan hidup bersama bukan bermaksud hanya tentang keselamatan.

"Ia tanggungjawab agama 'untuk saling mengenali satu sama lain' dan mencari titik yang mengikat kita sesama manusia sejagat, tanpa mengira kepercayaan," katanya.

Najib juga menggesa masyarakat mengetepikan jurang perbezaan bagi memastikan komitmen kepada toleransi dan keharmonian dapat dicapai. – 27 Oktober, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/tanpa-wasatiyyah-masyarakat-jatuh-ke-lembah-liberalisme-ekstremisme-kata-na>